

Date – 08/06/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Tamdil hmuna Fisheries Deptt enkawl Sangha chi siamna hmun chu a him theihnan Saitual Sub.Hqrs YMA in tunlai hian chhun zan zawmin an venpui.
2. Samthang khuaa Kuthnathawk ten an thar chhuah Zikhlum chu tunlai hian seng chhoh mek a ni a, Aizawl khawpuia hralh turin phurh chhuah thin a ni.
3. Prime Minister ni leh tura ruat Narendra Modi-a chuan President Droupadi Murmu-i hnenah sawrkar thar an siam theih thu a hrih.
4. Manipura buaina chhuak thar lehah Jeribam-ah curfew puan a ni.

<><><>

TAMDIL

Tamdil hmuna Fisheries Deptt enkawl Sangha chi siamna hmun chu tun aia a lo him lehzual theihna turin Sub.Hqrs YMA Saitual chuan tunlai hian chhun zan zawmin an venpui.

Kan corr sawi danin, Sub.Hqrs YMA Saitual leh Fisheries Deptt te hian lui dung nungcha leh Tamdil Fish Farm humhalh kawngah MOU an lo sign tawh angin Tamdila Sangha chi siamna hmun chu kuthlei leh suahsual thila khawih a nih loh nan tunlai hian chhun zan zawmin venpui hna thawh mek a. Tun hnaia helai vela lui dung nungcha lo khawih mi 10 vel man chhuahte chu ti tawh lo turin bond sign tir an nih bakah Tui lak kawng tifai a, samfaitir an ni bawk.

Sub. Hqrs YMA hruaitute chuan Tamdil leh a vela nungcha reng reng chu humhalh tlat a nih thu leh khawih lo turin mitin an ngen a. Helai vela Sangha humhalh kawngah Fisheries Deptt chu a tul angin an thawhpui zel dawn tih an sawi.

(Rammawizuala Saitual PTC)

<><><>

ASF

Vawk pulhri African Swine Fever (ASF) avangin Mizoramah vawk a thih belh zel a, Chhinchhiah danin kumin kum tir January thla atanga Vawk thi hi 1488 a tling tawh a, vawk suat 3002 a awm bawk.

Animal Husbandry and Veterinary Department hotute sawi danin Vawk pul hri hian District 7 tuamin khaw 80 a nghawng a, nimin khan vawk thi 64 awmin vawk suat 235 a awm an a, sawrkarin tun dinhmunah ram pawn leh state pawn atanga vawk lakluh khap mahse vawk hri hian Mizoram hmun hrang hrang a tuam hneh tawh hle ni.

Department hotute sawi danin kum 2021 chhung khan ASF vangin vawk 33,417 an thi a, kum 2022 khan vawk 12,795 thi in, kum 2023 ah vawk 1,039 an thi a ni.

African Swine Fever hri leng tur venna atan hian kum 2021 khan vawk 12,568 suat a ni a, kum 2022 ah vawk 11,686 suat niin kum 2023 ah vawk 928 tihlum an ni tiin thuneitute chuan an sawi bawk.

<><><>

LUNGLEI SOUTH MLA

Lunglei South Bialtu MLA Pu.Lalramliana chuan tunhnaia Cyclone Remal thawka ruah sur nasa avang a a bial chhung Mizoram Polytechnic Lunglei hnuai Kawngpui laih zau avanga min chu a nimin khan a tlawh a,

Bialtu MLA hi Pu.Lalnuntluanga Principal, Mizoram Polytechnic Lunglei chuan lo dawng sawngin, tunah hian Girls Hostel Building leh Quater thenkhat chu ruah a sur zel chuan min chhe mai thei dinhmunah a ding mek a, Girls Hostel a awm mek zirlai 21 zinga 7 te chuan Lunglei a an chhung te belin an insuan chhuak tawh a, zirlai hmeichhe dang mi 14 te pawh Campus hmun himah dah fel an ni tawh tih Principal hian a sawi a, tunah hian thawktute luah lai Quater pathum ami te pawh an insuan chhuak tawh a ti bawk.

Leimin avanga Mizoram Politychnic Lungleiin harsatna an tawh lai hian bialtu MLA hi Aizawl lamah a awmlai a nih avangin a hmunah a tlawh nghal thei lo chu pawh a tih thu a sawi a, a hriat ve leh DC lam pawh a biak pawh nghal thu leh a theih ang ang a thuneituten bawhzui a hma an lo la nghal chu lawmawm a tih thu Lunglei South Bialtu MLA chuan a sawi a ni.

Lunglei South Bialtu MLA chuan Fur chhung chuan kawnglah chawlhsan rih tura tih a nih thu leh, tun dinhmunah chuan hmalak zui dan tur han sawi mai theih a nih lo thu a sawi a. Polytechnic Girls hostel in an hmun-hma an luahzui ngam tak loh chungchangah leh an harsatnate pawh Higher & Technical Education changtu Minister pawh a sawipui tawh thu leh Dept. lam pawhin lo ngaihven vat an tum thu Minister hian a lo hrih thu a sawi a ni.

<><><>

SAMTHANG

Champhai District a Samthang khuaa Kuthnathawk ten an thar chhuah Zikhlum chu tunlai hian seng chhoh mek a niin Aizawl khawpuia hralh turin phurh chhuah thin a ni a,

Kumin hian Samthang Zikhlum chingtute hian Zikhlum tiak nuai 10 vel ching anga ngaih a ni a. Tuna Zikhlum lak tur nei ho hi March thla ruahtui hmasa bera phun nung ho kha a ni a, Kg 1 cheng 42 inkharchhawngte hnenah an pe a ni.

Samthang VCP Pu C.Lalrintluanga hnen atanga thu dawn danin, Samthang khuaa kuthnathawktute hian Samtawk kg. khat Rs. 70 in an hralh mek bawk. Zikhlum leh Samtawk hi an phur kawp thin dawn a ni.

Samthang khuaah hian chhungkaw 247 cheng mekin, an zinga chhungkaw 70 velin Zikhlum leh Samtawk hi an ching mek a, Kum 2004 atang khan Samthang ramah hian Fur zikhlum chin an uar tana, Samthang khua hian kum tin Quintal 4000-6000 vel an thar thin a, Samtawk hi Quintal 3000-4000 vel an thar thin bawk. Chawhrualin kumkhat a kan sum hmuhzat hi cheng nuai 80 atanga nuai 120 vel a ni tlangpui a ni.

<><><>

CYCLONE VICTIM MISSING

May Ni 28-a Melthuma leimin in a hnawl zinga la hmuhloh pathumte chu a nawlpuia zawn chawlhsan ni tawh mahse Melthum YMA ten a remchan dan angin an la zawng chhonzawm.

Tun dinhmunah Ramdinsangi, thla 4 mi, Lalvenhima Kum 8 leh Lalthakima Kum 42 te hmuh an la ni lova, Central YMA bultuma a nawlpuia zawn hna chu Ni 7 a tlin hnuah chawlhsan ni tawh mahse Melthum khawtlang chuan an la zawng chhonzawm a ni.

Hetihrual hian Aibawka leiminin a hnawl Pu Matthew Lalchhanhima, kum 34 pawh Aizawk Branch YMA Salem Section ten an la zawng chhonzawm a, Inrinni lo awm tur khian hmuh ala nihloh chuan Aizawk branch YMA pum huapin zawn hnatlang koh an tum a ni.

<><><>

CHAMPHAI-BLOOD DONATION

Champhai Zotlang North KTP chuan Half Yearly pualin a mamawh apiangte hman turin District Hospital Champhai Blood Bank-a dah tur thisen nimin khan an pe a, thisen hi unit 44, mipa 36 leh hmeichhia 8 ten an pe a ni. Champhai Zotlang N KTP te hian an lo tih thin dan ang in kumtin Half Yearly ah thisen hi an pe thin a, Nimin khan District Hospital Champhai Blood Bank-a thawktute chuan Champhai Zotlang North KTP te a hmunah kal chilh in thisen hi an la a, a vaiin thisen Unit 44 an la a ni.

District Hospital Champhai Blood Bank a thawktute chuan hetianga midang nun chhan nana thisen petute chungah lawmthu an sawi a, mimal leh pawl hrang hrangte pawn midang nun chhan nana thisen pe zel turin an sawm nghal bawk a ni.

<><><>

NDA LEADER NARENDRA MODI STAKES CLAIM TO FORM GOVERNMENT; SAYS, ALLIANCE WILL FORM STRONG, STABLE, GROWTH-ORIENTED GOVT

Prime Minister ni leh tura ruat Narendra Modi-a chuan nimin tlai khan President Droupadi Murmu-i a hmu a, sawrkar thar an siam theih thu a hrilh.

Sawrkar thar hi naktuk Pathianni zan lamah Rashtrapati Bhavan-ah lakluh a ni ang a. President chuan Prime Minister leh a cabinet chu Pathianni zan dar 7 leh minute 15-ah a lalut ang.

Hemi hma nimin vek khan BJP President JP Nadda kaihhruai NDA palaite chuan President hi an lo hmu tawh a, BJP Parliamentary Party leader atana Narendra Modi-a thlan a nih thu hriattirna lehkha an thehltut a, NDA-a tel party-ten an thlawpna lehkha pawh President hnenah hian an thehltut nghal bawh a ni.

Rashtrapati Bhavan pawn lama a sawi danin Narendra Modi-a chuan NDA chuan sawrkar chak, ngelnghet leh thang duang a siam dawn a ti a. President chuan amah chu Prime Minister tura a ruat thu a sawi a. A sawrkar chuan ram mipuite rinna leh beiseina an ti hlawhtling dawn tiin a sawi bawh a ni.

<><><>

MANIPUR: GOVERNMENT IMPOSES CURFEW IN JIRIBAM

Manipur sawrkar chuan zirtawp zan atanga boruak duhawm lo a chhuah avangin Jeribam-ah curfew a puang.

Hetianga buaina a chhuah chhan hi Ningani-a mi pakhat huan kal chu hliam tuara thi-a hmuh a nih avang a ni a. Hemi vanga boruak sosangah hian hnam pahnihte chenna in engngemaw zat misualin an halsak ni-a sawi a ni a.

District thuneitute chuan Zirtawp zing atang khan Jeribam khawpui chhungah curfew an puang zui a. Nunna leh bungruain a tawrh lohna turin venhimna kalpui zui a ni a. Security force-te chuan he khawpuia tharum thawhna hmuna chengte chu nimin khan hmun him lamah an suan chhuak a ni.

<><><>

CEC RAJIV KUMAR LAUDS OFFICIALS FOR SUCCESSFUL CONDUCT OF LOK SABHA POLLS

Chief Election Commissioner Rajiv Kumar chuan Lok Sabha inthlanpuia an chanvo tha taka an hlenchhuah avangin Returning Officer leh District Election Officer zawng zawngte chu lawmthu a hrilh.

District Magistrate te, Deputy Commissioner te, Returning Officer-te leh District Election Officer-te chu lehkha thawnin inthlan vuakveta boruak chi hrang hrang leh hlawhtlinnate chu chhinchhiah tlat turin a ti a. Election Commission-in anmahni leh an district chhunga inthlan buaiputute chunga lawmthu a sawi chu pawm turin a ngen bawh a ni.

<><><>

CHANDRABABU NAIDU TO TAKE OATH AS ANDHRA PRADESH CM ON JUNE 12

Telugu Desam Party National President N Chandrababu Naidu-a chu June ni 12, chawhma dar 11 leh minute 27 khian Andhra Pradesh Chief Minister atan lakluh a ni dawn.

Chief Minister hi Vijayawada kianga inkhawm buatsaihah lakluh a ni dawn a. NDA hruaitu te, thenawm state Chief Minister-te he hunah hian tel tura beisei an ni. Tun tum hi Chandrababu Naidu-a Chief Minister term 2-na tur a ni.

Tun hnaia Andhra Pradesh Assembly inthlanah khan NDA tangrual - Telugu
Desam Party, Janasena leh BJP chuan Assembly seat 175-ah seat 164 an la a ni.

<><><>